

# Chrönig vor Schöpfig



Texscht : Mike Sutter  
Musig : Mike Sutter

Ei Milliarde Ching, jedes zwöite uf der Ärde  
Muess i töifschter Armuet, viu z'schnäu Erwachse wärde  
Nüt z'ässe, dräckigs Wasser u keis Deheime me  
Chrank u missbruucht u nie ä Schueu vo inne gseh

Wäutwit wärde jährlech 950 Milliarde  
Dollar – elei für Rüschtigsusgabe verbrate  
Für d'Chinderarmuet ändgüwtig us dr Wäut z'verdränge  
Würde – hett me grächnet - 70 Milliarde länge

doch für söttige Firlefanzen, näbesächlechs Gfotz  
hei d'Regierige ke Inträsse u ke Chlotz  
Anstatt i d'Zuekunft vo der Chugle z'inveschiere  
Tüe si lieber hirnlos ufmunitioniere

D'Chrönig vo dr Schöpfig  
Pardon, we ni lache  
Mir chunnt's ender vor aus wäri  
D'Mönschheit nid ganz bache

Mir hei doch gmeint dä Ufrüschtigswettloun sig verbii  
Doch schecke sie hütt meh aus vor em Muurfau dri

D'Achs vom Böse, Merci schön, isch das ä fule Trick  
Vorwand fürne aggressivi Erschtschlag-Politik  
Me schüüret ir Bevöukerig d'Angscht vor Terrorischiere  
Drbi si die wo tüe regiere säuber Extremischiere

Russland und dr Kaukasus äs einzigs Puwferfass  
Im Vorder und im Mittler Oriänt regiert dr Hass  
Südlech vor Sahara versinkt Afrika im Bluet  
In Asie entladt sech i Bürgerchriege d'Wuet

Überau Konflikte, Chriege, Aschleg, Aggression  
Wäg Macht u Gäud u ethnische Problem u Religione  
Chöit Gift druf nä dass demnächst ire Grossstadt irgendwo  
ä Massevernichtungswaffe wird zum litz cho

D'Chrönig vo dr Schöpfig  
Pardon, we ni lache  
Mir chunnt's ender vor aus wäri  
D'Mönschheit nid ganz bache

Gägenang statt mitenang, Dischput statt Dialog  
D'Gwautschpirale dräiht, mir gö unger i däm Sog

S'Globale Dorf, das tönt doch so idyllisch  
Obwouh dä Begriff ä absolute Müll isch  
Drin im Dorf tuet sich ä wiiissi Minderheit verschanze  
U füet sech uf Chöschte vo dene duss dr Ranze

Die vorusse das si aui die ir dritte Wäut  
Dene wo's Soziau u Materieu a auem fäut  
Die im Dorf vergreise mangus Reproduktion  
U dusse grassiert d'Bevöukerigsexplosion

Ir dritte Wäut kämpft jede um die blutti Exischtänz  
Drwile implodiert dr Weschte i sir Dekadänz  
D'Schäri zwüsche Wouhschtang u Armuet geit usnang  
Meh und meh bis sie d'Form hett vomne Bumerang

D'Chrönig vo dr Schöpfig  
Pardon, we ni lache  
Mir chunnt's ender vor aus wäri  
D'Mönschheit nid ganz bache

S'geit nümm so lang wie's gange isch dass die sech vo de Wiisse  
So arrogant u rücksichtslos löh lo i d'Chappe schiisse

D'Gletscher zieh sech zrügg, chasch ne zueluege drbi  
Gli scho wird dr Nordpou im Summer iischrfrei si  
Überschwemmige u Schtürm, längi Dürreperiode  
Paume und Olivehaine ufem Suschte obe

Söu mer eine säge, d'Mönsche sig nid tschuwd  
S'Gschaft isch viu z'räntabu, mit em schwarze Guwd  
20 Milliarde Tonne CO2 pro Johr  
verbrönne mir i d'Luft schteuet öich die Mängi vor

D'Öumagnate, we's drum geit a nöji Queue z'cho  
Gö sie über Liiche u löh ke Boum lo sctoh  
S'isch jedes Mittu rächt vo Landroub bis Korruption  
Protektioniert vo Fründe i höchster Position

D'Chrönig vo dr Schöpfig  
Pardon, wen i lache  
Mir chunnt's ender vor aus wäri  
D'Mönschheit nid ganz bache

schtatt i auternativi Energie z'inveschtiere  
tüe mer dr globau Kollaps schtiuschwiegend toleriere

Im Schnitt verschwinde 150 Tier- u Pflanzearte  
Pro Tag us üsem blau Planet sim einzigartig Garte  
D'Läbesrüüm zerschört, gwiuderet u gfrävlet  
Für immer us dr Balance vor Natur use gschnäflet

Drei Viertu vo de Fischgründ si überfischet und bedroht  
Vo aune Koraueriff si sächzg Prozänt in Not  
Vier füftu vom urschprünglech Urwaud si verschwunde  
und umne Schuttplatzflechi mingere si witer pro Sekunde

i de letschte vierzg Johr hett me unschiniert  
D'Heufti vo de Süesswasservorrät ruiniert  
I zwänzg Johr wärde wäutwit – s'isch gar nüm z'vermide  
Zwe Drittu vor Bevöukerig a Wassermangu lide

D'Chrönig vo dr Schöpfig  
Pardon, wen i lache  
Mir chunnt's ender vor aus wäri  
D'Mönschheit nid ganz bache

D'Biosphäre vo der Ärde, die isch filigran  
Doch mir wüete wie dr Elefant im Porzellan

So wird's nid ewig go, dervo bi ni überzoge  
Langsam aber sicher überschpannt dr Mönsch dr Boge  
Churzfristigs Dänke, Rücksichtslosigkeit  
Profitgier, Aggression und Machtbesässeheit

Am Mitmönsch aber ou dr Umwäut gägenüber  
Irgendeinisch nööchstens überlouft dr Züber  
Während die Mächtige satt u zfride schloofe  
Fuehrt dä igschlaginig Wäg greidiwägs i d'Kataschtrophe

We uf dere Ärde mou dr letscht Boum grodet isch  
Und im letschte trüebe Bach schtirbt dr letscht vergiftet Fisch  
We ä Orkan se knickt hett, die letschte düüre Äre  
Wärde d'Mönsche merke dass me sech vo Gäud nid cha ernähre

D'Chrönig vo dr Schöpfig  
Pardon, wen i lache  
Mir chunnt's ender vor aus wäri  
D'Mönschheit nid ganz bache

,nach uns die Sintflut' wird mou uf üsne Greber schtöh  
Leider hei die Lätze chürzlech ä Choschtprob gha dervo